

『懷風藻』淡海朝大友皇子二首 伝記

皇太子者。淡海帝之長子也。魁岸奇偉。風範弘深。眼中精耀。顧盼煒燁。唐使劉德高。見而異曰。此皇子。風骨不似世間人。實非此國之分。嘗夜夢。天中洞啓。朱衣老翁。捧日而至。擊授皇子。忽有人。從腋底出來。便奪將去。覺而驚異。具語藤原內大臣。歎曰。恐聖朝萬歲之後。有巨猾間釁。然臣平生曰。豈有如此事乎。臣聞。天道無親。唯善是輔。願大王勤修德。災異不足憂也。臣有息女。願納後庭。以克箕帚之妾。遂結姻戚。以親愛之。年甫弱冠。拜太政大臣。總百揆以試之。皇子博學多通。有文武材幹。始親萬機。群下畏服。莫不肅然。年二十三。立為皇太子。廣延學士沙宅紹明・塔本春初・吉太尚・許率母・木素貴子等。以為賓客。太子天性明悟。雅愛博古。下筆成章。出言爲論。時議者。歎其洪學。未幾文藻日新。會壬申年之亂。天命不遂。時年二十五。